



Su Contecurte no publichin poesiis, lu saveis, ma o vin simpri une vore, ma une vore di gust cuant che un Contecurtâr al ven preseât e al cjape cualchi biel premi.

Al è di pôc che un nestri contercirtâr al à cjapât un biel ricognossiment: la segnalazion intal nomemât concurs “Gjso Fior” inmaneât dal comun di Verzegnis.

Si che duncje, jessint che Gianfranco, che nô ducj o cognossin cul non di Plume di Ingjustri, al è stât cussì zentîl di regalânus la poesie, e al gust di condividi cu la nestre osterie la sô sodisfazion, vele chi, la poesia segnalade.

Grassie, e ben fate, Plume di ingjustri!

Un quadri tal cîl

Cuant che la lûs

*planc a planc si distude,
daûr des cretis dai monts,
e lis vôs si pierdin glotudis dal scûr,
mi plâs cul pinsâr
tirâ dongje ducj i nûi,
sparniçâts lenti ator,
e cul inzen di un pitôr,
fâ intal cîl come dal vêr,
un quadri dal nestri Friûl.
Dentri dal sfont de cengle dai monts,
meti chel biel incjant
des valadis de Cjargne,
cui roiuts di aghe nete resint*

*che ven jù cjantuçant,
jenfri dai claps e la calme dai pins,
ingrampâts cu lis lidrîs intai crets.
E su ogni slambri di tiere,
fâ une piçule baite,
cul fum che al jes dal camin,
che al odore di cjalin,
e di frico di malghe.
E plui jù,
prin de plane,
in ogni slac dal Dean o dal Fele,
poiâ ducj chei paisuts
che e parin jessûts di un libri di flabis.
E sot sere,
jentrâ tai fogolârs,
cul fûc impiât sot lis cjalderis,
e tal sclopetâ des slusignis
cjoli su chel bonodôr di polente
e fissâlu tal cuadri ancje chel.
Daspò,
cul aiût dal aiar di tramontan,
puartâlu a ducj chei furlans
lâts a vore pal mont,
lontan di chê tiere
che an dentri tal cûr.*